

思古齋詩

鈔

戊辰九月

澤之

思古齋詩鈔

膠西柯劭慧稗筠

秋懷七首

唧唧草蟲鳴離離眾星列白露勁柔條
澹楚結叢樾踟躕還入房含悽心如結
羅帳漾清商綺牖籠寒月百憂觸物生
慨然傷離別

其二

朝槿謝殘紅籬菊發黃藻金風生桂枝玉



露凋芳草客懷多感傷覽物憎寒早轉身
入我房怒焉心如擣綺窗曖夕暉邃室增
幽窈豈必日月馳維憂以用老

其三

秋風自何來吹我庭前草昨旦含芬芳今
夕成枯槁物理有變遷人事豈常保寄語
閨中女勿恃朱顏好莫挽羲娥車奄忽催
人老密勿思古人庶以慰懷抱

其四

落葉下亭皋歲暮不自聊羈旅無定所
翩若蓬飄開軒一以眺四野何蕭條心隨
商飈飛日共秋旻遼寒煙結遠隰餘景散
陵喬冉冉羲娥馳興往不可要

其五

枯莽委巖趾槁籜隕林梢高下雖殊科零
落固同朝念我非金石胡爲長鬱陶人生
本物旅大化誰能超以此慰我懷援筆成
長謠

其六

耀靈馳西陸少昊司秋節翩翩野藿飛澄
澄寒潭潔我生多艱虞覽物難爲悅時往
若馳波一逝不可綴來憂如循環百轉還
相結禦風傷綵絺卒歲無衣褐徘徊終何
之對影惟明月

其七

凝霜凋蘭蕙白露被荆榛好惡雖云殊零
落同秋旻天地無終極物理難長存持此

有時軀而懷常苦辛始知至人德樂道在
守真兩臂重萬乘況乃百年身

其八

秋夜一何長漫漫難及晨我非壯士志胡
爲懷苦辛披衣起徘徊仰看參與辰三星
猶在戶河漢未西淪世累忽相擾百憂坐
自臻歡愉隨時棄衰病逐年侵榮獨自天
啟多艱將誰陳棄置無復道惆悵難再論

擬古三首

朝採陌上花夕翫庭中月賞心亦何常遇
物卽遷別人情旦夕更寵祿豈長託顏闔
逃魯幣子搜戀丹穴寡慮物可遺欣名道
自闕修身非外求達生信可樂

其二

女蘿本微薄得依松柏枝繁英何蕊蕊密
葉亦萋萋朝蒙慶雲惠夕被渥露滋哀此
小草心自謂終不移陰陽有變化禍福自
相基淒寒變春旭杲日忽陰霾朔風振林

莽喬木難獨持松柏旣摧敗女蘿亦離披
流潦凋翠采春日委青蕘薄祐由天啟知
命復何疑感此聊自慰同歸亮有期

其三

森森千尺松亭亭自偃蓋陵谷有變遷此
木獨不改旣負棟梁材豈辭翦與敗誰知
歲寒姿未足美人睎蘭蕙吐異香雲霞煥
奇采回首語寒松持節將焉待

擬行行重行行

遙遙遠行邁悠悠懷所思問我將焉懷哀
此生別離去君曰永久相見邈無期隰淇
皆有岸端憂獨無涯朱顏退紅采綠鬢著
素絲春華委霜霰營魂豈久持一息不自
保何況待來茲

擬涉江採芙蓉

采采芙蓉花灼灼多佳色日暮水層波沈
吟楚江側蘭蕙不時生芳洲安可得馨香
難久留念此遠行客

擬青青河畔草

灼灼桃李花天天當風枝皎皎彼姝女媼
媼好容儀鏘鏘鳴玉佩采采羅裳衣佳人
誰不慕高節終自持交愛無良媒空令神
魂馳何不化行雲慰我長相思

擬庭中有奇樹

珍木生中庭花葉含清芬愛此好顏色可
以贈佳人繁英久已茂欲寄感無因行行
芳樹下不覺淚沾巾誰謂感節物有懷意

所親

記夢二首

晨風起幽閨落月照東壁念彼泉下人
淒愴無終極昔別各千里今別永幽隔
昨夜夢君來朱顏若疇昔舉帷相與言
似訴久離析含悲語未畢驚寤杳無跡
顧眄惟四壁爾魂何由適天路本茫茫
此理誰能識反憶夢中情默默思所歷

其二

秋聲何淒清棲禽夜忽驚我生逢百憂感
此涕自零涕零可奈何思君若流波暫別
傷契闊永離沉泉穴房櫳來悲風虛空自
生寒憶昨夢寐中彷彿睹君顏惕寤無所
見形影空自憐冥冥泉下人曷云復來還
君往不復還余生豈能延寄居當幾時憂
患在其間昊天實爲之爲之復何言

送二兄赴蜀

瑟瑟晚風興朗朗燈燭明今夕共言笑明

晨卽遠行清醕多且旨嘉肴皆豐盈行人
怨離別對酒不能傾晤言欲相慰未語涕
自零余心尙如此客懷難爲情黽勉加餐
飯溫恭交友生勸君莫感傷歲往若流星
努力各自愛慎勿慙所生

其二

流波戀故溪棲鳥憶舊枝感此念同生宿
夕當別離依依家人意綿綿遊子思雞鳴
起行邁焉得常相依愁多夜轉促欲語難

盡辭勿懷川陸長相晤自有期勿爲貧賤
傷勲業自有時願君愛玉體慰我長渴饑

仲秋翫月懷敬孺鳳孫兩兄

丹桂花始芳綠蘭香未歇之子隔異鄉奄
忽至佳節攀桂意莫舒採蘭心自結持此
欲贈問道遠音塵闕惆悵望遙天寒色生
秋月月色令人悲入戶還掩扉瑣窗凝素
藹瑤席委清暉清暉不可埽愁懷不能道
反憶遠行人應傷秋色好與君爲連枝相

見時何少輶軻百年間離憂摧人老綿綿
一寸心迢迢千里道

接郭妹紉蘭書勸余養生爲要余感

賦此詩

肅肅秋風來長林淨如埽離居怨日長別
久驚寒早故人寄書來遺我青粘草勸余
愛春華勿爲離憂擾但得日月長豈愁歡
會少白壁不足珍綠髮誠堪寶胡爲櫻世
情空使朱顏老讀君尺素章令我開懷抱

初晴

山村雨初晴園林淨如沐皎潔寒潭清寥
次秋旻肅炎暑隨節闌清商因時復蘭蕙
含宿滋葵藿傾晨旭花籬解殘紅苔蹊著
新綠良遊信可歡客意苦拘束何以遣我
懷自種庭前菊

春日雜詩

仲春多清和喜逢新雨後駕言出行遊徘徊
顧我園綈李被素錦天桃著丹繡交交